


Af samleið sjávarútvegs og hlutabréfamarkaðar

HB Grandi er eitt stærsta sjávarútvegsfyrirtæki landsins og er stærsti handhafi íslenskra aflaheimilda. Félagið er eina sjávarútvegsfyrirtækið sem er með hluti sína skráða í Kauphöll Íslands og þannig má segja að rúm 11% aflaheimilda við Ísland séu skráð í Kauphöll í gegnum HB Granda.

Markaðsvirði HB Granda er í dag tæplega 57 ma.kr og samsvarar það rúmlega 9% af heildarverðmæti allra skráðra hluta í Kauphöll. Líklega er það einsdæmi að sjávarútvegur sé svo stór hluti af samanlögðu markaðsvirði hlutabréfa nokkurrar kauphallar. Ólíkt öðrum sjávarútvegsfyrirtækjum hurfu hlutir HB Granda aldrei af hlutabréfamarkaði enda þó þeir hafi horfið af Aðalmarkaði Kauphallarinnar í tæp átta ár.

Fjöldi skráðra sjávarútvegsfyrirtækja í Kauphöll Íslands




Leyfum okkur að horfa átta ár aftur í tímann, til ársins 2006. HB Grandi var þá eitt þriggja sjávarútvegsfyrirtækja sem eftir voru í Kauphöllinni og þó íslenskur fjármálamarkaður hafi sjálfsagt talið sig vera að upplífa einhvers konar blómaskeið var blómaskeiði sjávarútvegsins í Kauphöllinni þá u.þ.b. að ljúka.

Sjávarútvegur var burðarás í uppbyggingu íslensks hlutabréfamarkaðar á tíunda áratugnum. Þegar kom að aldamótum státaði nánast hvert einasta sjávarplass af skráðu sjávarútvegsfyrirtæki...eða næstum því. Flest voru þau árið 1999 eða 24 talsins og eru þá talin með fyrirtæki í veiðum, vinnslu og markaðssetningu sjávarafurða.

Breyting á fjölda skráðra fyrirtækja segir takmarkaða sögu því á þessu tímabili gekk á með sameiningum fyrirtækja í sjávarútvegi og fækkaði þeim m.a. af þeim sökum.


Á fyrstu árum þessarar aldar voru átta af tíu kvótahæstu útgerðarfyrirtækjum landsins skráð í Kauphöll og líkt og sjá má á myndinni hér að neðan lætur nærri að um helmingur aflaheimilda íslenskra skipa hafi verið á hendi skráðra almenningshlutafélaga.

Hlutfall aflaheimilda íslenskra skipa á hendi skráðra fyrirtækja



Á þessum tíma birtu stærstu sjávarútvegsfyrirtæki landsins reglulega fréttir af afkomu og horfum í gegnum fréttakerfi Kauphallarinnar. Almennir höfðu því greiðari aðgang en nú er að upplýsingum um gengi greinarinnar í heild og mismunandi árangur og áherslur félaganna. Auk þess gat hvaða Íslendingur sem er valið að fjárfesta í greininni og lífeyrissjóðir, verðbréfasjóðir og tryggingafélög voru í hópi stærstu hluthafa – líkt og núna á við um HB Grandi.

Vægi sjávarútvegs í Kauphöll Íslands



HB Grandi heldur áfram að skrifa sögu íslensks sjávarútvegs og íslensks hlutabréfamarkaðar og vonandi munu fleiri sjávarútvegsfyrirtæki sjá tækifæri í skráningu á markað. Aðeins eigendur fyrirtækjanna geta svarað þeirri spurningu fyrir sig. Hér verður því samt haldið fram að sjávarútvegurinn og Kauphöllin muni eiga farsæla samleið fyrir höndum.

Íslensk sjávarútvegsfyrirtæki sem skráð hafa hlutabréf sín í Kauphöll Íslands eða undirmerkaði hennar eru: Básafell, Fiskeldi Eyjafjarðar, Fiskiðjusamlag Húsavíkur, Fiskmarkaður Breiðafjarðar, Grandi, Guðmundur Rúnólfsson, Haraldur Böðvarsson, Hraðfrystihús Eskifjarðar (Eskja), Hraðfrystihúsið Gunnvör, Íslenskar sjávarafurðir, Jökull, Krossanes, Loðnuvinnslan, Samherji, SÍF, Síldarvinnslan, Skagstrendingur, SR-mjöl, Sölumiðstöð hraðfrystihúsanna (Icelandic), Tangi, Vinnslustöðin, Þorbjörn, Þormóður rammi, Útgerðarfélag Akureyringa.

Heimildir: Nasdaq OMX, Fiskistofa, Ársskýrslur félaga, Hagstofan og Greiningardeild Arion banka

Greiningardeild Arion banka

Anna Hrefna Ingimundardóttir
anna.ingimundardottir@arionbanki.is

Elvar Ingi Möller
elvar.moller@arionbanki.is

Guðmundur Reynir Gunnarsson
gudmundur.gunnarsson@arionbanki.is

Hrafn Steinarsson
hrafn.steinarsson@arionbanki.is

Stefán Broddi Guðjónsson
stefan.gudjonsson@arionbanki.is

Forstöðumaður

Regína Bjarnadóttir
regina.bjarnadottir@arionbanki.is
444-6969

[Hér má finna fyrirvara](#)